



Vol. 9 | No. 1 | 1965



সাহিত্য পত্রিকা

journal.bangla.du.ac.bd

মুসলিম মানস ও বাংলা সাহিত্য (১৭৫৭-১৯১৮)

Volume	9
Issue	1
Year	1965
ISSN	0558-1583
eISSN	3006-886X
Author(s)	আবদুল করিম
Published online	June 15, 1965
DOI	10.62328/sp.v9i1.11
Link to article	https://doi.org/10.62328/sp.v9i1.11
Pages	224-238
Publisher	University of Dhaka
Copyright	সাহিত্য পত্রিকা
Designed and Developed by	Zobayer Abdullah

॥ ২ ॥

মুসলিম মানস ও বাংলা সাহিত্য (১৭৫৭—১২১৮)।

পৃষ্ঠা বারো+৫২৬; ড: আনিস্‌জ্জামান প্রণীত, লেখক সজ্জ প্রকাশনী,
বর্ধমান হাউস, ঢাকা — ২,

আশ্বিন ১৩৭১ (অক্টোবর, ১৯৬৪); মূল্য : আট টাকা মাত্র।

বইখানি ঢাকা বিশ্ববিদ্যালয়ের পি. এইচ. ডি উপাধির জ্যেষ্ঠ অনুমোদিত গবেষণাগ্রন্থ ‘ইংরেজ আমলের বাংলা সাহিত্যে বাঙালী মুসলমানের চিন্তাধারা’র (১৭৫৭—১৯১৮) কিঞ্চিং পরিবর্তিত আকার। ইহা দুই ভাগে বিভক্ত: প্রথম ভাগের চারটি অধ্যায়ে ‘দেশা ও কাল’ শিরোনামায় ১৭৫৭—১৮০০, ১৮০১—১৮৫৭, ১৮৫৮—১৯০৫, ১৯০৫—১৯১৮ খ্রীস্টাব্দ পর্যন্ত বাঙালী মুসলমানদের ঐতিহাসিক পটভূমিকা বর্ণনা করা হয়েছে এবং এতে মুসলমানদের রাজনৈতিক, ধর্মীয়, সামাজিক অবস্থাাদি এবং শিক্ষাক্ষেত্রে তাদের ভূমিকার পরিচয় দেওয়া হয়েছে। দ্বিতীয় ভাগের ছয়টি অধ্যায়ে মুসলমানদের সাহিত্য ও চিন্তাধারার পরিচিতি দেওয়া হয়েছে। বর্তমান সমালোচনা প্রবন্ধ প্রথম ভাগের বা ঐতিহাসিক পটভূমিকার আলোচনায় সীমাবদ্ধ থাকবে।

গ্রন্থকার ঠিকই বলেছেন যে “মধ্যযুগের বাংলা সাহিত্য হিন্দু ও মুসলমান উভয় সম্প্রদায়ের অবদানে সমৃদ্ধ। এর তুলনায় আধুনিক বাংলা সাহিত্যের ক্ষেত্রে বাঙালী মুসলমানদের পশ্চাৎপদতা বিন্ময়কর। বাংলা সাহিত্যের উৎসাহী পাঠক মাত্রই লক্ষ্য করেছেন যে ১৮০০ থেকে ১৮৬০ খ্রীস্টাব্দ পর্যন্ত অর্থাৎ আধুনিক বাংলা সাহিত্যের প্রস্ফুটি পর্বে — বাঙালী মুসলমান সম্পূর্ণরূপে নিষ্ক্রিয়।” (পৃ: এক) এই নিষ্ক্রিয়তার ব্যাখ্যা দেওয়ার জন্মে তিনি বাঙালী মুসলমানদের সামাজিক ইতিহাসের কয়েকটি দিক আলোচনা করেছেন, কারণ “একমাত্র সামাজিক ইতিহাসের দিকে দৃষ্টিপাত করলেই বাঙালী মুসলমানদের এই অবস্থা-সংকটের ব্যাখ্যা পাওয়া যাবে।” (পৃ: এক)

মোটিমুটিভাবে গ্রন্থকার যা বলতে চেয়েছেন তা হচ্ছে এই : আধুনিক বাংলা সাহিত্যের প্রস্ফুটি পর্বে মুসলমানদের নিষ্ক্রিয়তার প্রধান কারণ তাদের আর্থিক

দুর্বলতা ; আর্থিক দুর্বলতার জন্য তারা আগ্রহ থাকা সত্ত্বেও ইংরেজী শিক্ষা লাভে বঞ্চিত ছিল এবং ফলে আধুনিক জ্ঞান-বিজ্ঞানের সাথে অপরিচিত ছিল। এই সময়ে মুসলমানদের মধ্যে যে-সব “ভাব-আন্দোলন” দেখা দিয়েছিল, সেগুলি ছিল পশ্চাৎ-পন্থী অর্থাৎ তাদের “মূলে ছিল প্রাচীন ধর্ম-জীবনের আদর্শে ফিরে যাবার ইচ্ছা” ; এই সব আন্দোলন মুসলমানদের সঙ্গে “আধুনিক জীবন ও জগতের বিচ্ছেদ ঘটায়” ; সুতরাং লেখকের মতে মুসলমানদের আর্থিক অসচ্ছলতাই তাদের শিক্ষা-দীক্ষায় অনগ্রসরতার মূল কারণ এবং এই কারণেই মধ্য-যুগের বাংলা সাহিত্যে মুসলমানদের বিশেষ অবদান থাকা সত্ত্বেও আধুনিক বাংলা সাহিত্যের প্রস্তুতি পর্বে তাদের বিশেষ কোন অবদান লক্ষণীয় নয়।

এখন প্রশ্ন উঠে, মুসলমানদের আর্থিক দুর্গতির কারণ কি? গ্রন্থকারের মতে এর কারণ বাংলা দেশে ইংরেজদের শাসন এবং শোষণ-নীতির ফলে চাষী মজুররা সর্বাপেক্ষা বেশী ক্ষতিগ্রস্ত হয় এবং মুসলমান-প্রধান বাংলা দেশে “ইংরেজ শাসন-ব্যবস্থায় সাধারণ প্রজাদের যে ছুদর্শার কথা আমরা বলেছি, ঘটনাক্রমে তাদের অধিকাংশই ছিলেন ইসলাম ধর্মে বিশ্বাসী।” (পৃ: ৯) এই মতবাদ স্থাপন করতে গিয়ে গ্রন্থকার মুসলমানদের আর্থিক দুর্গতি সম্পর্কে কয়েকটি প্রচলিত মতবাদ বর্জন করেছেন। যেমন, তিনি বিশ্বাস করেন না যে, ১. চিরস্থায়ী বন্দোবস্তের ফলে হিন্দু জমিদারেরা মুসলমান জমিদারদের স্থলাভিষিক্ত হয়। ২. লাখেরাজ বাজেয়াপ্তির ফলে মুসলমানেরা হিন্দুদের চেয়ে বেশী ক্ষতিগ্রস্ত হয়। ৩. মুসলমান বিদ্রোহ কোম্পানী শাসনের সরকারী নীতি ছিল বা শাসন ক্ষমতা হারাবার পরে মুসলমানেরা ইংরেজ বিদ্রোহী হয়ে পড়ে। ৪. মুসলমানেরা ইচ্ছা করে ইংরেজী শিক্ষা বর্জন করে।

এখন প্রশ্নগুলি সম্পর্কে আলোচনা করা যাক। প্রথম প্রশ্ন হচ্ছে, চিরস্থায়ী বন্দোবস্তের ফলে হিন্দু জমিদাররা মুসলমান জমিদারদের স্থলাভিষিক্ত হয় কি-না? এ বিষয়ে গ্রন্থকারের মত স্পষ্ট; তিনি বলেন, “নবাবী আমলে জমিদার বলে যাদের আখ্যা দেওয়া যেত, তাঁদের মধ্যে মুসলমানের সংখ্যা কম। ইংরেজ আমলে পুরোনো জমিদারের বদলে নতুন জমিদার শ্রেণীর সৃষ্টি হয়। ঘটনাক্রমে নতুন জমিদারেরা সকলেই আসেন হিন্দু সমাজ থেকে,

কিন্তু পুরোনো যুগেও আধিপত্য ছিল তাঁদের।” (পৃ: পাঁচ) তাঁর নতুন মতবাদ স্থাপন করতে গিয়ে গ্রন্থকার নওয়াবী আমল থেকে অর্থাৎ নওয়াব মুর্শিদকুলী খানের সময় থেকে আলোচনা শুরু করেছেন এবং দেখাতে চেষ্টি করেছেন যে ১৭২৮ খ্রীস্টাব্দে বৃহত্তর ১৫টি জমিদারীর মধ্যে ২টি এবং ২১টি ছোট জমিদারীর মধ্যে ২টি ছিল মুসলমানদের হাতে। (পৃ: ১০) তিনি আরও বলেন “উচ্চ সরকারী চাকুরীতে এতদিন পর্যন্ত উত্তর ভারতীয় মুসলমানদেরকেই নিয়োগ করা হত : এই প্রথার ব্যতিক্রম করে তিনি [মুর্শিদকুলী খান] সেই সমস্ত ক্ষেত্রে বাঙালী হিন্দু কর্মচারী নিয়োগ করার দৃষ্টান্ত প্রতিষ্ঠা করেন। তাঁর পরবর্তী নবাবেরা এই দৃষ্টান্ত অনুসরণ করেছিলেন।” (পৃ: ৪) বলা বাহুল্য তাঁর এই দুইটি গুরুত্বপূর্ণ উক্তির জন্ত তিনি জেমস গ্র্যান্ট-এর Analysis of the Finances of Bengal এবং স্যার যত্নাথ সরকারের History of Bengal, Vol. II-এর উপর সম্পূর্ণ নির্ভর করেছেন। (যত্নাথ সরকার আবার সলিমুল্লাহর “তওয়ারীখ ই-বাঙ্গাল”-এর উক্তির উপর নির্ভর করেছেন।)। কিন্তু তিনি লক্ষ্য করেননি যে জেমস গ্র্যান্ট বাংলা দেশের সকল জমিদারের নাম উল্লেখ করেননি এবং যত্নাথ সরকারের উক্তি জমিদারদের জন্ত প্রযোজ্য নয়, বরং পদস্থ হিন্দু কর্মচারীদের উপর প্রযোজ্য ; তাছাড়া যত্নাথ সরকারের তথ্য নির্দেশক সলিমুল্লাহর উক্তি কতখানি নির্ভরযোগ্য তাও প্রশ্নাধান করার প্রয়োজন রয়েছে, কারণ সলিমুল্লাহ মুর্শিদকুলী খানের মৃত্যুর ৩৬ বছর পরে ইংরেজ গভর্নর হেনরী ভ্যানাসটার্ট-এর আদেশে বইখানি রচনা করেন। কোম্পানী দিওয়ানী লাভের প্রথম আমলের ইংরেজ লেখকগণ এবং উচ্চপদস্থ ইংরেজ অফিসাররা মুর্শিদকুলী খানের শাসন ব্যবস্থা তথা মোগল শাসন ব্যবস্থাকে হয় প্রতিপন্ন করার জন্ত সলিমুল্লাহর বই খানিকে তথ্য স্বরূপ ব্যবহার করেছেন। অর্থাৎ সলিমুল্লাহর বইখানি ইংরেজ শাসকদের প্রচারপত্র হিসাবে ব্যবহৃত হয়। সে যাই হউক আরও অগ্রসর হওয়ার পূর্বে মুর্শিদকুলী খান কর্তৃক হিন্দুদের নিয়োগের বিষয়ে একটু আলোচনা করা যাক। সম্রাট আওরঙ্গ-যেবের মৃত্যুর পর তাঁর উত্তরাধিকারীদের মধ্যে পর পর কয়েকটি গৃহযুদ্ধের ফলে দিল্লীর ক্ষমতাও খর্ব হতে থাকে ; ফলে ঐ সময় থেকে দিল্লী থেকে উচ্চ পদস্থ মুসলমান কর্মচারী প্রদেশসমূহে পাঠানো প্রায় বন্ধ হয়ে যায়। এর প্রত্যক্ষ ফল

বাংলা দেশে হিন্দু অফিসার নিয়োগ। দ্বিতীয়তঃ কলকাতায় কোম্পানীকে ঘিরে একদল হিন্দু বানিয়া শ্রেণী গড়ে উঠছিল; তাদের ঠেকাবার উদ্দেশ্যে মুর্শিদকুলীখান মুর্শিদাবাদে আর একদল হিন্দু কর্মচারী শ্রেণী গড়ে তোলেন। তবু লক্ষ্য করার বিষয় এই যে মুর্শিদকুলী খানের সময় কোন হিন্দু প্রশাসনিক বা সামরিক বিভাগে ফৌজদার ইত্যাদি উচ্চপদ পায়নি; কোন হিন্দু দিওয়ান বা নায়েব-দিওয়ানের পদও পায়নি। রাজস্ব বিভাগে নিম্ন শ্রেণীর চাকুরীতে (যেমন কানুনগো, আমিন, পাটওয়ারী ইত্যাদি) সর্বদাই হিন্দুরা সংখ্যাগরিষ্ঠ ছিল। মুর্শিদকুলী খান শুধু তাদের ছ'একজনকে পদোন্নতি দান করেন, তবুও হিন্দুরা মুসলমানদের তুলনায় অনেক নীচু ছিল। হিন্দুরা রায়রায়সানের পদ পায় মুর্শিদকুলী খানেরও পরে।

আমার মনে হয় ডঃ আনিস জেমস গ্র্যান্টেরও ভুল ব্যাখ্যা করেছেন। গ্র্যান্ট কোথাও বলেননি যে বাংলা দেশে মাত্র ১৫টি বড় এবং ২১টি ছোট জমিদারী ছিল (প্রকৃত পক্ষে চিরস্থায়ী বন্দোবস্তের সময় বাংলা দেশের জমিদারীর সংখ্যা হাজারেরও বেশী ছিল)। পক্ষান্তরে গ্র্যান্ট ভূমি-রাজস্বের হিসাবের জন্য পরগনাগুলিকে খালসা এবং জাগীর রূপে ভাগ করেন। খালসার অংশের ভাগ নিম্নরূপ ছিল :

১. প্রথমে ১—১৫ নং পর্যন্ত ১৫টি বড় জমিদারী; এদের মধ্যে ২টি মুসলমানদের অধীনে।
২. দ্বিতীয় ভাগে ১৬—২৫ নং পর্যন্ত ১০টি; এদের মধ্যে ১৬ ও ১৭ নং মুসলমানদের অধীনে, ১৬ নং জমিদারী এত বড় ছিল যে বর্ধমান ও রাজশাহী জমিদারীর পরেই এর স্থান।

১৮—১৯ এবং ২১ নং জমিদারের নাম উল্লেখ নাই।

২০ নং জমিদারী হিন্দুর অধীন।

২২ নং জমিদারী খালসার অধীনেই নয়।

২৩ নং বন্দর বালেশ্বর, অর্থাৎ বালেশ্বর বন্দরের আদায়কৃত শুদ্ধ।

ইহা সরকারের খাস ছিল, কোন জমিদারের নাম নাই।

২৪ নং এ চূনাখালীর জমিদারী, হুগলী বন্দরের গুড় এবং টাকশালের গুড় একসঙ্গে ধরা হয়েছে। এদের মধ্যে চূনাখালীর জমিদার ছিলেন মুসলমান (তওয়ারীথ-ই-বাজালা ত্রুটব্য) এবং টাকশাল ও হুগলী বন্দর সরকারের খাস ছিল, কোন জমিদারের অধীন নয়।

২৫ নং এ মজকুরী নাম দিয়ে অনেকগুলি জমিদারীর উল্লেখ করা হয়েছে। এবং এগুলিকে হিসাবের সুবিধার জন্ত ২১ ভাগে ভাগ করা হয়েছে। (ডঃ আনিস একে ২১টি ছোট জমিদারী রূপে উল্লেখ করেছেন।) ডঃ আনিস বলেছেন যে এই ২১টি জমিদারীর ২টা মুসলমানদের অধীনে ছিল। কিন্তু তিনি লক্ষ্য করেননি যে এখানে সকল জমিদারের নাম উল্লেখ করা হয় নি, জমিদারীর সংখ্যাও ঠিক ২১টি নয় এবং অনেক জমিদারী সরকারের খাস ছিল।

জাগীর অংশ সরকারী আলি, বন্দা ওয়ালা দরগাহ, আমীর-উল-ওমরা, ফৌজদারান, মনসবদারান, জমিনদারান, মদদ-ই-মাআশ, সালিয়ানাদারান, ইনাম আল-তমঘা, রোজিনাদারান, আমলা আলাম, আমলা নওওয়ারা এবং খেদা আফি-ইয়াল ইত্যাদি ১৩টি ভাগে বিভক্ত ছিল। অর্থাৎ জাগীর অংশ মোগলদের উচ্চ পদস্থ কর্মচারীদের জাগীর এবং বিশেষ সামরিক কারণে প্রতিষ্ঠিত বিভিন্ন বিভাগ সমূহের এবং এমনকি লাখেরাজ ভূসম্পত্তিতেও বিভক্ত ছিল। জাগীর অংশে ১৭২৮ খ্রীস্টাব্দে খাজনার পরিমাণ ছিল ৩৩,২৭,৪৭৭ টাকা। এই বিরাট ভূসম্পত্তির কথা ডঃ আনিস উল্লেখ করেন নি।

মোগল আমলে মুসলমান ও হিন্দু জমিদারদের তুলনামূলক সংখ্যা নিরূপণের জন্ত (সঠিক সংখ্যা নিরূপণ করা হয়তঃ কোনদিন সম্ভব হবে না) মুর্শিদকুলী খানের সময় থেকে আরম্ভ না করে সম্রাট জাহাঙ্গীরের সময় থেকেই আলোচনা শুরু করা দরকার। কারণ জাহাঙ্গীরের আমলেই বাংলা দেশে মোগল রাজস্ব ব্যবস্থা পুরোপুরি চালু হয়। মিরঘা নাথনের 'বাহরিস্থান-ই-গায়বী'তে জানা যায় যে জাহাঙ্গীরের সময় পরাভূত ভূঞাদিগকে স্ব স্ব জমিদারিতে বহাল রাখা হয় এবং এমনকি তাদের জমিদারী মোগল প্রথা অনুসারে জরীপও করা হয় না। (রাজ-নৈতিক পরিস্থিতি বিবেচনা করেই ভূঞাদের এই অতিরিক্ত সুবিধা দেওয়া হয়।)

সকলেই জানে যে ভূঞাদের মধ্যে মুসলমানরা বেশী প্রতিপত্তিশালী ছিল এবং তারা সংখ্যাগুণে হিন্দুদের চাইতে কম ছিল না, বরং বেশী ছিল বলা চলে। নওয়াবী আমলে এসব ভূঞাদের উত্তরাধিকারীদের অবস্থা কি হয় তা গ্রহকার বিবেচনা করে দেখেননি। মোগল আমলে শাসন ব্যাপারে জমিদারদের স্থান ও মর্যাদা সম্পর্কে পণ্ডিতদের মধ্যে বিতর্কের অবকাশ আছে; বিতর্কমূলক সংজ্ঞা-গুলি বাদ দিলেও দ্বিধাহীন ভাবে বলা যায় যে নিয়মিত রাজস্ব আদায় করলে কোন জমিদারকে জমিদারীচ্যুত করা হত না। দুর্ভাগ্যবশতঃ মোগল আমলের রাজস্ব বিভাগীয় দলিল পত্রাদি আমাদের হস্তগত হয় নি, তাই এ বিষয়ে স্থির সিদ্ধান্তে উপনীত হওয়া সম্ভব নয়; অন্ততঃপক্ষে গ্রহকার যেভাবে জমিদারী ক্ষেত্রে মুসলমানদের সচ্ছলতা নির্ধারণ করেছেন, তাতে নয়ই। কিন্তু চিরস্থায়ী বন্দোবস্তের ফলে মুসলমানেরা কি করে জমিদারী হারায় তা সঠিকভাবে নির্ধারণ করার মত তথ্য এখনও পাওয়া যায়; দুর্ভাগ্যবশতঃ সে সব তথ্যে গ্রহকারের প্রবেশ (access) ছিল না। ১৭৭২ খ্রীস্টাব্দে কোম্পানী বাংলার দিওয়ানী স্বহস্তে গ্রহণ করে এবং ১৭৭২ খ্রীস্টাব্দ থেকে ১৭৯৩ খ্রীঃ এর চিরস্থায়ী বন্দোবস্ত পর্যন্ত কয়েকবার ভূমি বন্দোবস্ত দেয়। এই সব বন্দোবস্তের ফলে সম্পূর্ণ দলিল, এমনকি জিলাওয়ারী ও প্রদেশওয়ারী জমিদারদের নাম, তাদের দেয় খাজনা, ইত্যাদির পূর্ণ তালিকা বিলাতের ইণ্ডিয়া অফিস লাইব্রেরীতে রক্ষিত আছে। বিভিন্ন বন্দোবস্তের তালিকাগুলি তুলনামূলকভাবে বিশ্লেষণ করলে পরিষ্কার বুঝা যায়, —প্রত্যেক বন্দোবস্তে কয়জন পুরাতন জমিদার জমিদারী হারায় এবং কয়জন নূতন জমিদার তাদের স্থলাভিষিক্ত হয়। জমিদারের নাম দেওয়া থাকায় জমিদারীচ্যুত মুসলমান জমিদারদের সংখ্যাও নিরূপণ করা সম্ভব। এসব দলিলগুলি দেখার সৌভাগ্য আমার হয়েছে; কিন্তু আমি অল্প বিষয়ের গবেষণায় লিপ্ত থাকায় এ বিষয়ে কোন তথ্য লিপিবদ্ধ করার সুযোগ পাই নি। কিন্তু আমার মনে হয় ১৭৭২-১৭৯৩ খ্রীস্টাব্দ পর্যন্ত সময়ে অনেক মুসলমান জমিদার জমিদারীচ্যুত হয়েছে এবং তাদের জায়গায় ইংরেজ কোম্পানী ও কোম্পানীর উচ্চপদস্থ কর্মচারী-পুত্র অনেক বানিয়া তাদের স্থলাভিষিক্ত হয়েছে। অবশ্য সঙ্গে সঙ্গে অনেক হিন্দু পুরাতন জমিদারও জমিদারী হারিয়েছে। ১৭৭২ খ্রীস্টাব্দের কমিটি অব সারকিট

(Committee of Circuit) কর্তৃক প্রদত্ত টাকা চাকলার বন্দোবস্তের তালিকা-খানি আমি অনুশীলন করেছি; এতে দেখা যায় যে টাকা চাকলার মুসলমান জমিদারদের সংখ্যা নিতান্ত কম নয়। যদিও হিন্দু জমিদারদের তুলনায় মুসলমানদের সংখ্যা কম। কিন্তু স্মরণ রাখতে হবে যে কমিটি অব সারকিট জমি বন্দোবস্তের সময় পুরাতন জমিদারদের কোন সুযোগ-সুবিধা দেয়নি, বরং যারা বেশী টাকা খাজনা দিতে রাজী হয়েছে তাদেরকেই বন্দোবস্ত দিয়েছে। পদচ্যুত জমিদারদিগকে দেয় রাজস্বের মাত্র শতকরা ৫ টাকা হারে ভাতা দেওয়ার ব্যবস্থা করা হয়েছিল। সুতরাং ১৭৭২ সনের বন্দোবস্তেও অনেক পুরান জমিদার (হিন্দু ও মুসলমান উভয়েই) জমিদারী হারায় এবং বানিয়া শ্রেণীর নতুন জমিদারেরা তাদের স্থলাভিষিক্ত হয়। সুতরাং এবিষয়ে আমার বক্তব্য এই যে ইণ্ডিয়া অফিসের উপরোক্ত দলিলাদি পুঙ্খানুপুঙ্খরূপে বিশ্লেষণ না করে শুধু ছ'একজন আধুনিক লেখকের উপর ভিত্তি করে এক কথায় বলে দেওয়া যায় না যে চিরস্থায়ী বন্দোবস্তের আগে বা নওয়াবী আমলে মুসলমান জমিদারের সংখ্যা নিতান্ত নগণ্য ছিল বা চিরস্থায়ী বন্দোবস্তের ফলে মুসলমান জমিদাররা ক্ষতি-গ্রস্ত হয় নি।

গ্রন্থকারের দ্বিতীয় প্রতিপাত্ত বিষয়, লাখেরাজ বাজেরাপ্তির ফলে মুসলমান এবং হিন্দুরা সমভাবে ক্ষতিগ্রস্ত হয়েছে, কারণ মুসলমানদের লাখেরাজ বাজেরাপ্তের সঙ্গে সঙ্গে হিন্দুদের দেবোত্তর সম্পত্তিও বাজেরাপ্ত হয়; হিন্দুদের নগদ টাকা থাকায় তারা তাদের আর্থিক অবস্থা পূর্ণগঠন করতে সমর্থ হয়, কিন্তু দারিদ্র্যের ফলে মুসলমানরা তা করতে পারেনি। আপাতদৃষ্টিতে লেখকের প্রতিপাদ্য বিষয়টি যুক্তিসহ, কিন্তু মুসলমানদের লাখেরাজের সঙ্গে হিন্দুদের দেবোত্তর সম্পত্তির তুলনা যুক্তিসঙ্গত নয়। কারণ মুসলমানদের লাখেরাজ সম্পত্তি ছই ভাগে বিভক্ত ছিল : প্রথমতঃ মুসলমান শয়খ, সুফী, আলেম, সৈয়দ ইত্যাদি বিদ্বজ্জনকে মোগল সম্রাট বা নওয়াব কর্তৃক প্রদত্ত লাখেরাজ বা নিজের সম্পত্তি, যা তাঁরা পুরুষানুক্রমে ভোগ দখল করতে পারতেন। এইসব লাখেরাজ সম্পত্তি জাগীর, ইনাম, আল-তমঘা, আইমা, সুয়ুরগাল, মদদ-ই-মাআ'শ ইত্যাদি নামে পরিচিত ছিল। বাদশাহ এবং নওয়াবরা হিন্দুদের

মধ্যে সাধক ও বিদ্বজ্জনকে একরূপ লাখেরাজ সম্পত্তি দান করতেন, কিন্তু সংখ্যায় হিন্দুরা মুসলমানদের তুলনায় অনেক কম ছিল। প্রকৃতপক্ষে একরূপ ভূসম্পত্তির মধ্যে শুধু মুসলমানদের প্রদত্ত জমি পনরটি বিভিন্ন নামে এবং শুধু হিন্দুদের প্রদত্ত জমি তিনটি বিভিন্ন নামে পরিচিত ছিল এবং মুসলমান ও হিন্দু উভয় সম্প্রদায়ের লোককে প্রদত্ত জমি নয়টি বিভিন্ন নামে পরিচিত ছিল। দ্বিতীয়তঃ মুসলমান জমিদাররাও ধর্ম প্রতিষ্ঠানের জন্তু যেমন মসজিদ, মাদ্রাসা, সূফীদের দরগাহ বা কবর ইত্যাদির রক্ষণাবেক্ষণের জন্তু সম্পত্তি দান করত। হিন্দুদের দেবোত্তর সম্পত্তি শুধু এই দ্বিতীয় প্রকারের সম্পত্তির সঙ্গে তুলনীয়। সুতরাং বাজেয়াপ্ত হওয়ার ফলে মুসলমান ও হিন্দুরা সমভাবে ক্ষতিগ্রস্ত হয়নি; মুসলমানদের লাখেরাজ সম্পত্তি হিন্দুদের তুলনায় অনেক বেশী ছিল। তাছাড়া বিশেষ বিশেষ সামরিক কার্য সমাধার জন্তুও নওয়ারাবী আমলে অনেক জমি সামরিক অফিসারদের ভোগ দখলে যায়; যদিও এগুলি মূলতঃ মোগলদের জাগীরের নামান্তর, নওয়ারাবী আমলে, বিশেষ করে, নওয়ারাব আলীবর্দী খানের আমলে একরূপ জাগীরগুলি চাকুরীর পরিবর্তে অফিসারদের পুরুষানুক্রমিক ভোগ দখলে চলে যায়। উদাহরণ স্বরূপ, নওওয়ারা, আমলা-ই-আলাম ইত্যাদি বিভাগগুলির নাম করা যায়। দিওয়ানী লাভের পরে পরেই এবং ১৭৯৩ খ্রীস্টাব্দের আগেই এ বিভাগের জমিগুলি কোম্পানী কর্তৃক বাজেয়াপ্ত হয়; কোম্পানীর শাসনের গোড়ার দিকের দলিল দস্তাবেজে এর অনেক প্রমাণ পাওয়া যায়। লাখেরাজ বাজেয়াপ্তির প্রশ্নে বিশদভাবে পর্যালোচনার জন্তু প্রয়োজনীয় তথ্য ও দলিল সমূহ ইণ্ডিয়া অফিস লাইব্রেরীতে রক্ষিত আছে। এবং এসব দলিলাদির সাহায্যে বাজেয়াপ্তকৃত মুসলমান এবং হিন্দু সম্পত্তির খাঁটি পরিমাণও নির্ধারণ করা সম্ভব, এটা অবশ্য ঠিক যে নগদ টাকা থাকার ফলে বাজেয়াপ্তের পরে হিন্দুরা তাদের আর্থিক অবস্থা পূর্ণগঠিত করতে সক্ষম হয়, আর নগদ টাকার অভাবে মুসলমানরা তা পারেনি।

গ্রন্থকারের তৃতীয় ও চতুর্থ প্রতিপাণ্ড বিষয় হল, মুসলমানের প্রতি বিদ্বেষ ভাব পোষণ করা কোম্পানীর শাসনের নীতি ছিল না এবং মুসলমানেরাও ইংরেজদের প্রতি বিদ্বেষ ভাবাপন্ন ছিল না এবং মুসলমানেরা ইচ্ছা করে

ইংরেজী শিক্ষা বর্জন করেনি। প্রথমেই বলে রাখা দরকার যে, এইগুলি এমন বিষয় যার সম্বন্ধে হঠাৎ কোন সত্ব্তর দেওয়া সম্ভব নয়। ১৭৫৭ খ্রীস্টাব্দের পরে যে-কোন বিষয় আলোচনা করার জন্ম আমাদের প্রাথমিক তথ্য হল ইংরেজ কোম্পানীর রক্ষিত দলিল পত্র; তাদের দলিলে নিশ্চয়ই এমন কিছু পাওয়ার আশা করা যায় না, যাতে মুসলমানদের প্রতি তাদের নীতি নিশ্চয় করে বলা যাবে। অবশ্য ইংরেজদের প্রশাসনিক আইন কানুনেও মুসলমান বিদ্বেষের কোন প্রমাণ পাওয়া যায় না, তাই মনে হয় গ্রন্থকারের উক্তির প্রথমার্শ যথার্থ। কিন্তু রাজনৈতিক ক্ষমতা হারবার পর মুসলমানরা ইংরেজদের প্রতি সন্দেহের চোখেই দেখত, এতে কোন সন্দেহ নাই। (অবশ্য স্বার্থান্বেষী মুসলমানদের কথা এখানে বাদ দিতে হয়; কারণ তাদের ধর্ম বা নীতি কিছুর বালাই নাই, তাদের ধর্ম বা নীতি হল স্বার্থ)। ডঃ আনিসুজ্জামান নিজে সন্ন্যাসী ও ফকির বিদ্রোহের উল্লেখ করেছেন, নওয়াব শমস-উদ-দৌলার বিদ্রোহের কথাও উল্লেখ করেছেন। কিন্তু এসব সর্বজনবিদিত বিদ্রোহ ছাড়াও ইংরেজদের দিওয়ানী লাভের গোড়ার দিকে আরও অনেক ছোটখাট বিদ্রোহের প্রমাণ পাওয়া যায়; যেমন বাংলা দেশের কয়েকজন ফৌজদার বিদ্রোহ করেছিলেন, এবং কয়েকজন মুসলমান জমিদার কোম্পানীকে রাজস্ব দিতে অস্বীকার করেন। ইংরেজরা মুশিদাবাদের নওয়াবের নামে ফৌজদারদিগকে দমন করে এবং রাজস্ব আদায় করতে অস্বীকৃত জমিদারদের নিছক ছবুঁত এবং ডাকাত আখ্যা দিয়ে শাস্তি করে। এসব তথ্যও ইণ্ডিয়া অফিসে রক্ষিত Secret Consultations এবং Revenue Consultations-এ পাওয়া যায়।

গ্রন্থকার দ্ব্যর্থহীন ভাষায় বলেছেন যে মুসলমানেরা ইংরেজী শিক্ষাবর্জন করেনি, বরং আর্থিক অসচ্ছলতাহেতু ইংরেজী শিক্ষালাভে সমর্থ হয় নি। এবিষয়ে তিনি ডঃ এ. আর. মল্লিকের উপর নির্ভর করেছেন। কিন্তু এ বিষয়ে যথেষ্ট বিতর্কের অবকাশ আছে। বর্তমান বিংশ শতাব্দীতেও ইংরেজী শিক্ষার প্রতি মুসলমানদের বিদ্বেষ আমরা নিজের চোখে দেখেছি। স্তুরাং উনিশ শতকের গোড়ার দিকে তারা ইংরেজী শিক্ষার প্রতি বিরূপ হবে না, একথা অবিশ্বাস্য। তা ছাড়া ডঃ মল্লিকের আলোচনারও পরিষ্কৃত হয় যে শুধু আর্থিক দুর্বলতা

ছাড়া মুসলমানদের ইংরেজী শিক্ষা না করার অন্য কারণও ছিল। এখানে ডঃ মল্লিকের উদ্ধৃতি দিচ্ছি :

P.178 "Consequently, they [the Government] adopted an extremely cautious attitude and advised the Committee [of the Calcutta Madrasah] that in all attempts at improvement they should endeavour to carry with them the voice of the educated classes of the community. Even what was useless, if highly prized, should not be hastily rejected. The Madrasah Committee was told that the selection of what is valuable in the works actually studied is naturally the first step in the introduction of an improved system of study."

P. 182 "Dr. Lumsdan had been an advocate of teaching Western Science in the Madrasah but had hesitated to act without specific orders from the government. But encouraged now by the emphatic declarations of the Examiners, he pressed the General Committee for a decided policy. He knew that the Committee was apprehensive of possible antagonism of the Muslims to any innovation, but from his long experience as Secretary of the Madrasah he was sure that they would not object to English as a medium of instruction in sciences. He now stressed his point to the Government and also suggested that a stipend of Rs. 8/- per month be given to students who took this course to help overcome any religious scruples."

PP.188-189 "The General Committee was convinced it was the proper object of the Madrasah "to combine the knowledge of English with high attainments in Mahomadan literature and science." This was a correct approach to the problem of giving English education to Muslim students for they were not prepared to forego the language and literature of their own culture. But the next action of the Madrasah sub-Committee in requiring all students to attend the English class was undoubtedly unwise. In February 1833, came another resolution to the effect that from that date the students would be expected to study English and that "an increase from two to five rupees per mensem, according to proficiency shall be made" on the result of the examination. It appears that at the annual examination of 1833, the number of boys fell from 87 to 45."

ডঃ এ. আর. মল্লিকের বই থেকে অনেক বড় বড় উদ্ধৃতি দেওয়া হল কারণ বইখানি আমাদের গ্রন্থকার ডঃ আনিসুজ্জামান ব্যবহার করেছেন এবং মুসলমানদের ইংরেজী শিক্ষা সম্পর্কে ডঃ মল্লিকের সিদ্ধান্ত মেনে নিয়েছেন। কিন্তু উপরোক্ত উদ্ধৃতির সাহায্যে বিকল্প সিদ্ধান্তেরও ইঙ্গিত দেওয়া যায়, যা গ্রন্থকার বিবেচনা

করে দেখেননি। প্রথমত: কলকাতা মাদ্রাসার কমিটি গোড়া থেকে ইংরেজী শিক্ষার প্রতি মুসলমানদের বিরূপতার ভয় করত। কমিটি ইংরেজী শিক্ষার প্রবর্তনের প্রতি মুসলমানদের বিরোধিতার (antagonism) ভয় করত তাই অনেক ভেবে চিন্তে ইংরেজী শিক্ষা প্রবর্তন করে। কিন্তু সেক্রেটারী লামস্‌ডেন এর প্রভাবে সঙ্গে সঙ্গে ইংরেজী শিক্ষাব্রতী মুসলমান ছাত্রদের জন্ম উপযুক্ত বৃত্তির (Stipend) ব্যবস্থা করে। দ্বিতীয়ত: মুসলমান ছাত্রেরা আরবী ও ফারসী অর্থাৎ ধর্মীয় শিক্ষার সঙ্গে সঙ্গে ইংরেজী শিক্ষার আগ্রহী ছিল, ধর্ম-শিক্ষা বাদ দিয়ে শুধু ইংরেজী শিক্ষায় তাদের কোন আগ্রহ ছিল না। সকল ছাত্রের জন্ম ইংরেজী শিক্ষা বাধ্যতামূলক করা হলেও মুসলমান ছাত্রেরা তার প্রতি নিরাসক্ততার ভাব দেখায়, যার ফলে ১৮৩৩ খ্রীস্টাব্দের পরীক্ষায় পরীক্ষার্থীর সংখ্যা ৮৭ থেকে ৪৫-এ নেমে আসে। গ্রন্থকার আর এক জায়গায় বলেছেন “দিল্লীতে যখন কোম্পানীর উদ্যোগে কলেজ স্থাপিত হয়, তখন স্থানীয় মুসলমানেরা এই কলেজে পড়বেন কি না, এ সম্পর্কে তাঁর কাছে [শাহ আবদুল আজিজের কাছে] “ফতওয়া” দাবী করেন। তিনি সেই প্রতিষ্ঠানে মুসলমানদেরকে পড়তে উপদেশ দেন এবং বলেন যে সেটি ধর্মসিদ্ধ কাজ হবে।” (পৃ: ২২) মুসলমানেরা যদি ইংরেজী শিক্ষার প্রতি বিদ্বেষ-ভাবাপন্ন না হয়, তা হলে হাতের কাছে এরূপ একটি কলেজ পেয়ে তাতে বিদ্যাশিক্ষা করতে যাওয়ার আগে মওলানা সাহেবের কাছে ফতওয়া চাইবেন কেন? আর্থিক দুর্গতির জন্ম মুসলমানেরা ইংরেজী শিক্ষা গ্রহণ করতে পারেনি, একথা সত্য, কিন্তু সঙ্গে সঙ্গে ইংরেজী শিক্ষার প্রতি তাদের বিরূপতাও ছিল; এই দুই কারণের সম্মুখে মুসলমানরা শিক্ষায় অনগ্রসর থেকে যায়।

একথা অনস্বীকার্য যে পলাশীর যুদ্ধের পর হইতে মুসলমানেরা দৈন্য ও দুর্ভোগে পতিত হয়; মুসলমানদের এই আর্থিক দুর্গতির কারণ অনেকগুলি— যেমন প্রথমত: সামরিক বিভাগ কোম্পানীর হাতে চলে যাওয়ার মুসলমান সেনানায়ক এবং সৈন্যেরা চাকুরী হারায়; এটা অত্যন্ত তাৎপর্যপূর্ণ, কারণ মুসলমানদের একটা বিরাট অংশ (এখানে বিরাট অংশ মানে শতকরা ৭০।৮০

জন) সামরিক বিভাগে নিযুক্ত থাকত। দ্বিতীয়তঃ প্রশাসনিক ও বিচার বিভাগে সমূহেরও পুনর্গঠন হয়, ফলে আস্তে আস্তে ফৌজদার, সিকদার, কাজী, মুফতী ইত্যাদি উচ্চপদ কর্মচারীদের জীবিকার পথ বন্ধ হয় এবং সঙ্গে সঙ্গে তাদের অগণিত অনুচরবৃন্দের। রাজস্ব বিভাগের পুনর্গঠন হওয়ার ফলে ঐ বিভাগের উচ্চপদস্থ কর্মচারীরাও চাকুরী হারায় (অবশ্য মুসলমানরা রাজস্ব বিভাগের উচ্চপদগুলিই অধিকার করত, নিম্ন চাকুরীগুলি যেমন, আমিন, কানুনগো, পাটওয়ারী ইত্যাদি সর্বদা পুরুষানুক্রমে হিন্দুদের অধিকারে থাকত)। গ্রন্থকার হয়ত একথা স্বীকার করেন, কারণ তিনি উইলিয়াম হান্টারের এ মত বর্জন করেন নি। এককথায় বলতে গেলে সামরিক, প্রশাসনিক, বিচার এবং রাজস্ব বিভাগে অর্থাৎ সকল বিভাগেই মুসলমানেরা চাকুরী হারায়। ইহা অত্যন্ত তাৎপর্যপূর্ণ, কারণ এতে মোগল শাসনের কাঠামোই ভেঙ্গে যায় এবং ফলে মুসলমান অধিবাসীদের বৃহদংশ ক্ষমতাচ্যুত হয় এবং জীবিকার পথ হারায়। নওয়াবী আমলের পূর্ব থেকে মুসলমান ব্যবসায়ীরাও বাংলা দেশের অন্তর্বাণিজ্য এবং বহির্বাণিজ্যে বিশেষ তৎপর ছিল, এমন কি তারা মাঝে মাঝে ইউরোপীয় বণিক কোম্পানীদের সঙ্গে পাল্লা দিত। রাজনৈতিক ক্ষমতা ইংরেজ কোম্পানীর হস্তগত হওয়ার পর নানা কারণে এই সব ব্যবসায়ীরা তাদের ব্যবসা গুটাতে বাধ্য হয়; অবশ্য এই ব্যবসায়ীদের অনেকই (এমনকি প্রায় সবাই) বিদেশাগত বলে মনে হয়, কিন্তু তারা অনেক দেশী লোককে ব্যবসায়ে খাটাত, সুতরাং তাদের ব্যবসা গুটানোর ফলে দেশী অনেক লোকের (অবশ্য হিন্দু-মুসলমান উভয়ের) জীবিকাও সঙ্কুচিত হয়। বাকী থাকে শুধু জমিদার এবং দেশের কৃষক ও শ্রমজীবী শ্রেণী। যদিও ডঃ আনিস স্বীকার করেন না, আমার মনে হয় ইংরেজদের দিওয়ানী লাভের পরে, প্রধানতঃ ইংরেজদের বন্দোবস্ত এবং লাখেরাজ বাজেয়াপ্তির ফলে মুসলমান জমিদাররা সর্বস্বান্ত হয়। অর্থাৎ এক কথায় বলা যায় বাংলা দেশের মুসলমান আভিজাত্যের (aristocracy) কাঠামো সম্পূর্ণ ভেঙ্গে যায়। সুতরাং শুধু কৃষক এবং শ্রমজীবীদের দ্বারা হারোনো কাঠামো ঠিক রাখা সম্ভব নয়; শিক্ষাদীক্ষার প্রতি তারা কোন সময় আগ্রহান্বিত ছিল না, এখনও হয়নি। পুরানো অভিজাতশ্রেণীর লোকেরা

প্রথমে যতদূর সম্ভব আরবী ও ফারসী শিক্ষার দিকে মনোনিবেশ করে। ইংরেজীর প্রতি তাদের চেতনা ফিরে আসে অনেক পর; তখন হিন্দুরা অনেক দূর অগ্রসর হয়ে গেছে।

উনিশ শতকের শেষার্ধ্বে মুসলমানদের উচ্চশিক্ষার সঙ্গে পাটের চাষ বৃদ্ধির সংযোগ দেখিয়ে গ্রন্থকার একটি নূতন সংজ্ঞার দিকে পাঠকদের দৃষ্টি আকর্ষণ করেছেন। মনে হয় সংজ্ঞাটি খুবই যুক্তিপূর্ণ, তবে এবিষয়ে আরো একটু আলোকপাত করার প্রয়োজন রয়েছে। পাটচাষীদের মধ্যে মুসলমানদের এবং উচ্চশিক্ষা প্রাপ্ত মুসলমান ছাত্রদের আনুপাতিক হার বিচার্য। ১৮৭০ খ্রীঃ থেকে ১৮৮৫ খ্রীঃ পর্যন্ত সময়ে সরকার মুসলমান সমাজে শিক্ষা প্রচারের জ্ঞাত কয়েকটি ব্যবস্থা অবলম্বন করেছিল এবং শুধু মুসলমান ছাত্রদের শিক্ষার জ্ঞাত কয়েকটি মাদ্রাসা স্থাপন করেছিল। মুসলমানদের শিক্ষায় পাটচাষীর অবদান এবং সরকারী ব্যবস্থাদির অবদানের তুলনামূলক বিশ্লেষণ করতে পারলে বিষয়টি আরও পরিষ্কার হয়ে উঠবে। ব্রিটিশ আমলে বাংলা দেশের সামাজিক এবং অর্থ নৈতিক কাঠামো পরিবর্তনের প্রতিও গ্রন্থকার দৃষ্টি আকর্ষণ করেছেন। তিনি বলেছেন যে ‘ইংরেজ-শাসনকালে আমাদের সমাজ ব্যবস্থার কতকগুলি মৌলিক পরিবর্তন দেখা দেয়। গ্রামকেন্দ্রিক স্বয়ং-সম্পূর্ণ সমাজে ভাঙ্গন ধরে, জীবন যাত্রা হয়ে উঠে শহরমুখী আর অর্থ নৈতিক জীবনের মূল মাপকাঠি জমি থেকে রূপান্তরিত হয় মুদ্রায়। অর্থ নৈতিক কাঠামোর এই মৌলিক রূপান্তরের সঙ্গে সঙ্গে নতুন শ্রেণী-বিন্যাস দেখা দেয়। নবগঠিত এই সব শ্রেণী আবার ঐতিহাসিক নিয়মাহু-যায়ী নিজেদের ভূমিকা পালন করে সামাজিক অগ্রগতি সম্ভবপর করে তোলে।’

কয়েকটি সাধারণ ভুলের প্রতিও গ্রন্থকারের দৃষ্টি আকর্ষণ করা প্রয়োজন। তিনি বলেছেন ১৭১৭ খ্রীস্টাব্দে মুর্শিদকুলী খান বাংলা দেশের মোগলদের স্থায়ী দিওয়ান রূপে নিযুক্ত হন (পৃ: ৩)। কথাটা আমার কাছে পরিষ্কার হল না, কারণ আমরা বর্তমানে স্থায়ী অস্থায়ী বলে যা বুঝি, মোগল আমলে সে রকম কিছু ছিল না; মোগল বাদশাহদের ইচ্ছা-অনিচ্ছার উপরেই স্থায়ী অস্থায়ী নির্ভর করত! সে যাই হউক, মুর্শিদকুলী খান বাংলা দেশের প্রথম দিওয়ান নিযুক্ত হন ১৭০০ খ্রীঃ এবং ১৭০৭ খ্রীস্টাব্দ পর্যন্ত ঐ পদে বহাল থাকেন। ১৭০৮—১৭০৯ সাল

এই দুই বৎসর তিনি বাংলা দেশ ছেড়ে যান, কিন্তু ১৭১০ খ্রীষ্টাব্দে আবার দিওয়ান নিযুক্ত হয়ে ফিরে আসেন; ১৭১৫-১৬ খ্রীঃ তিনি সুবাদার নিযুক্ত হন (যহুনাথ সরকারে মতে তিনি ১৭১৭ খ্রীঃ সুবাদার নিযুক্ত হন।) (এ বিষয়ে আমার Murshidquli Khan & His Times দৃষ্টব্য) গ্রন্থকার আরও বলেন যে মুর্শিদকুলী খানের সময় থেকে বাংলার স্বাধীন নবাব-বংশের প্রতিষ্ঠা হয়। একথাটাও সত্য নয়; জীবনের শেষদিন পর্যন্ত মুর্শিদকুলী খান দিল্লীর বাদশাহর প্রতি অনুগত ছিলেন, বাদশাহই তাঁদের নিযুক্ত করেন। আলীবর্দী খানই সর্বপ্রথম নাদির শাহের আক্রমণের সুযোগ নিয়ে দিল্লীর সঙ্গে সম্পর্ক ছিন্ন করেন।

গ্রন্থকার বাংলা দেশের কৃষক ও শ্রমজীবীদের সম্বন্ধে বলতে গিয়ে অনুমান করেছেন যে মুসলমান প্রধান বাংলাদেশে কৃষক ও শ্রমজীবীদের মধ্যেও মুসলমানরা সংখ্যাগরিষ্ঠ ছিল (পৃঃ ৯)। পরে এই অনুমানকে কোন তথ্য ব্যতিরেকে তিনি দৃঢ় ভিত্তির উপর সংস্থাপিত করেছেন (পৃঃ ২৯)। বর্তমানে অবশ্যই বাংলাদেশে মুসলমানেরা সংখ্যাগরিষ্ঠ, যার ফলে বাংলাদেশ ভাগ হয়ে পূর্বাংশ পাকিস্তানে যোগ হয়েছে। কিন্তু প্রশ্ন উঠে বাংলাদেশে মুসলমানরা সংখ্যাগরিষ্ঠ হয় কোন সময়ে? আঠারশতকে সকলের ধারণা ছিল যে বাংলা-দেশে হিন্দুরা সংখ্যাগরিষ্ঠ; ক্যাপ্টেন আলেকজান্ডার হ্যামিলটন ১৭০৯-১০ খ্রীঃ হিন্দু ও মুসলমানের অনুপাত নির্ণয় করেছিলেন ১০০ : ১ রূপে। উনিশ শতকেও সাধারণ ধারণা ছিল যে হিন্দুরা সংখ্যাগরিষ্ঠ; শুধু আদমশুমারীর পরেই সকলে আকস্মিক ভাবে জানতে পারে যে বাংলাদেশে মুসলমানরা সংখ্যাগরিষ্ঠ। রিজলি সাহেব এই সংখ্যাগরিষ্ঠতার ব্যাখ্যাও দিয়ে দিলেন, যার উত্তর দিতে হল খোন্দকার ফজলে রব্বিকে তাঁর ‘হাকিকত-ই-মুসলমান-ই-বাংলা’ নামক পুস্তিকা লিখে। যাই হউক, বাংলা দেশকে মুসলমান প্রধান বলার আগে দেখতে হবে কোন সময়ের কথা বলা হচ্ছে, এবং সে সময়ে সত্যিই মুসলমানরা সংখ্যা-গরিষ্ঠ ছিল কিনা? প্রতিকূল সাক্ষ্যের অভাব নাই বলে এর প্রয়োজনীয়তা বিশেষভাবে অনুভূত হয়।

উপরের আলোচনায় দেখা যাবে যে মুসলমান সমাজের অনগ্রসরতা এবং আর্থিক দুর্বলতা সম্পর্কে ডঃ আনিসুজ্জামান কর্তৃক কয়েকটি প্রচলিত মত বর্জন

করার সঙ্গে আমরা একমত হতে পারিনি। এর ফলে অবশ্য ড: আনিসের বইখানির মূল্য কোন অংশে কমবে না, কারণ তাঁর বইখানি মূলত: সাহিত্যের আলোচনা; ঐতিহাসিক বিশ্লেষণে কিছু ক্রটি-বিচ্যুতি থাকলেও তাতে তাঁর গ্রন্থের সাহিত্যিক মূল্য কমবে না। তাছাড়া যে কোন মতামত গ্রহণ বা বর্জন করার স্বাধীনতাও তাঁর আছে। তিনি ঢাকায় বসে কাজ করেছেন, সুতরাং বিলাতস্থ ইণ্ডিয়া অফিস লাইব্রেরীর দলিলপত্রে তাঁর প্রবেশ ছিল না, সুতরাং আধুনিক লেখকদের উপর নির্ভর করা ছাড়া তাঁর গত্যস্তর ছিল না। ইণ্ডিয়া অফিসের হস্তালিখিত দলিলপত্রাদি পাওয়ার কোন প্রশ্নই উঠে না। এমন কি আঠার শতকের কয়েকজন বিখ্যাত ইংরেজ কর্মচারী লিখিত প্রামাণ্য গ্রন্থও তিনি দেখার সুযোগ পাননি। কিন্তু ঢাকায় পাওয়া যায় এরূপ কতকগুলি ছাপান দলিল ও ছাপান পুস্তকও গ্রন্থকারের দৃষ্টি এড়িয়েছে মনে হয়; উদাহরণ স্বরূপ Proceedings of the Committee Circuit, বিভিন্ন জিলার District Records, Colebrooke এবং Lambert এর Remark on the present state and husbandry of Bengal, সলিমুল্লাহর তওয়ারীখ-ই-বাঙ্গালা বা F. Gladwin কর্তৃক উক্ত পুস্তকের সার অনুবাদ ইত্যাদি।

ইংরেজ আমলে বাংলা দেশে মুসলমানদের সামাজিক এবং অর্থনৈতিক অবস্থার উপর ব্যাপক গবেষণা আজ পর্যন্তও হয়নি; ইদানীং ছ'একটা কাজ হচ্ছে, কিন্তু তাও এত মস্তুর গতিতে যে খুব শীঘ্র এবিষয়ে পরিষ্কার ধারণা করা যাবে কি-না সন্দেহ। কাজটি ঐতিহাসিকদের এবং এ কাজে অবহেলা করার জন্য দায়ীও ঐতিহাসিকেরা। তবুও সাহিত্যসেবী ড: আনিসুজ্জামান যে সাহস করে একটা নূতন মতবাদ স্থাপনের চেষ্টা করেছেন তা প্রশংসা পাওয়ার উপযুক্ত; তবে সঙ্গে সঙ্গে এ বিষয়ে আরও ব্যাপক গবেষণা করে তাঁর মতবাদ জোরদার করার দায়িত্বও তিনি নিলেন।